

四庫全書

集部

欽定四庫全書

兩宋名賢小集卷三百七十七

宋 陳思 編

元 陳世隆 補

秋堂遺稿

柴望字仲山文溪人個儻有氣節往來都下名公卿
俱客禮致之高宗朝叩闕上書議論抗直迕旨遂
繫獄旋奉詔放還晚年山居杜門謝絕世緣惟以詩

自娛云

吳樵溪山居

老子無家計蕭然屋數間
頭邊惟白髮眼底是青山
碁急鳥聲散琴低鶴睡閒
片雲長似伴朝去暮飛還

送朱南山開蜀閬

殿上傳宣內引官一封歷歷奏忠肝
八千里路先聲至
百萬都人夾道觀節度晉公新授鉞
淮陰韓信舊登壇
擎天正要中流柱莫擬人間蜀道難

詔許出獄呈京尹節齋趙公

臣子狂愚獻直言聖明寬大度如天十封應詔皆焚藁
一片憂時祇似弦數象逢丁陽九凡元龜為鑑後千年
今朝有旨從天下知召長沙到席前

靈芝寺別祖席諸友

落日寒城暮雨餘滿斟離酒意何如見妻還指張儀舌
痛國誰憐賈誼書羸馬病僮旋雇債寺禽山獠亦歛歔
長安可是深居處更向深山深處居

富陽道中

幾年只向長安去今日囊書被旨回
馬首獨行秋葉落鱸魚時共菊花杯
黃昏鐘動雁初下夜半月明潮正來
我自不歸歸便得故園早晚早梅開

和周居易見寄韻

十年為客上長安人指冰山不會寒
開口盡言投老易到頭只是挂冠難
低棲屋宇居常穩巧小園池坐儘寬
別有前溪魚可釣也須栽竹傍欄干

夢傳說

傳說為霖入夢中高宗一念與天通後來亦有君王夢
不是陽臺即月宮

錢塘

不記錢王建國年尚遺強弩射潮痕地迴王氣歸吳分
山挾潮聲出海門南渡幾年猶昨日西湖疎影自黃昏
客來獨凭欄千處時聽漁歌過遠村

越王勾踐墓

秦望山頭自夕陽，傷心誰復賦淒涼。
今人不見亡吳事，故墓猶傳霸越鄉。
雨打亂花迷複道，鳥翻黃葉下宮牆。
登臨莫向高臺望，烟樹中原正渺茫。

送馬太初之越

一去山陰一再溪，如何還只任分攜。
雨無聊賴人無寐，水又潺湲鳥又啼。
明日不知君上馬，中宵誰與共聞雞。
去時應有蘭亭句，為我臨池援筆題。

戒珠寺右軍宅

蒼樹寒烟兩渺茫
後來誰此弔興亡
晉朝風物今流水
蕭寺鐘聲幾夕陽
話燕梁空春雨急
愛鵝人去暮山長
學書弟子知何在
風過池塘墨尚香

和王景陽越中寄別韻

故人書只問平安
分已還山豈願官
猿鶴不驚松逕夢
貂蟬難換竹皮冠
長安落葉秋深見
故國斜陽雨後看
莫道剡中吟不盡
不成吟處亦停鞍

西施

十二金釵對對鋪三千粉黛膩如酥
君王莫道六宮醜
一箇西施已破吳

范蠡

五月菰蒲八月秋
年年灑泪酹江頭
伍胥忿怒三閭怨
爭似鴟夷一釣舟

金臺泊舟

欲謀歸去計歸去
更勿王化何時北江流
日夜東片帆
山共水竟夕雨和風
時事只如此相催成老翁

宿湖外

懶入城中去來維柳下舟空江明月上殘雨夕陽收好
景多歸夜他鄉易得秋倚梧吟不盡樽酒更登樓

金山寺

荻花蘆葉正珊珊山在長江寺在山門逕但從船出入
僧房多住水中間江空落日斜猶照夜半秋潮去復還
吟興未闌天欲曙一行斜雁起蒼灣

鳳凰臺

灑盡梧桐酒一盃興亡前事獨徘徊烏衣冉冉斜陽下
白鷺茫茫江水來鳳去不知經幾載客來惟只見高臺
間于登眺成孤嘯五百年間王氣回

石頭寺和王寧翁韻

懷鄉弔古易傷心絕頂危亭共客臨朝市亂經兵火後
山川轉覺樹雲深百年歌舞空臺沼六代豪華漫陸沈
惟有亂鴉歸去晚夕陽無限暮城陰

多景樓

早被垂楊繫去舟五更潮落大江頭闖河北望幾千里
淮南來第一樓昔日最多風景處今人偏動黍離愁
烟沙瀕洞翻蘋末欲倚西風問仲謀

山陰蘭亭

寂寂山陰事已塵至今亭址尚嶙峋落花時節朝朝雨
挿柳人家處處春曲水自流寒食酒茂陵無復永和人
昭陵繭紙今何在空有梅花點翠珉

別故人

便未成名也自歸不應猿鶴更猜疑冷看世事頻移局
懶與仙人共奕碁南渡只今惟有酒西興臨別是誰詩
行藏正要知時節却是時人未得知

送葉若磯之金陵謁信菴

一片斜陽落渡頭青袍烏帽獨登樓江流建業三千里
山色淮南數百州都督正開羊祜府誰人得上李膺舟
此行不為揚州鶴一字堪封萬戶侯

呈中書權直程滄洲

玉旨傳宣夜直扉制麻侵晚進呈歸三槐龍影連青鎖
千柳鶯聲度紫微袖惹爐香飄霧靄硯傳盤露映旌旂
承恩更賜金蓮炬猶勝清光太乙藜

富春嚴子陵祠

桑田何處海漫漫耕壟傳聞建武間真主不緣符白水
先生安可飯青山至今青草遺寒燒此日秋江起暮滌
萬里崎嶇祠下路不知行役幾人閒

歸來

歸計年來付酒盃任他猿鶴自相猜東家種竹西鄰看
前日移花昨夜開鐘送夕陽歸草木風吹涼月上樓臺
老來懶聽他家曲惟看柴門長綠苔

長城

漠漠沙場萬里遙千夫一日起臨洮若無道德為干櫓
更是秦人築更高

沛中歌

秦時日月漢山河家計今誰與仲多天子不知天下貴

酒中惟唱沛中歌

越山

吳越山分兩岸青
隔江帆影是西興
江花亂落如紅雨
雲樹高低似畫屏
錢氏古鄉迷輦道
越王芳草上諸陵
已知太乙臨吳分
曉看祥鳥夜看星

雲夢

紀生尚可稱皇帝
韓信何妨作假王
今日偽遊真是偽
只因一躡誤高皇

塞下行贈韋士穎歸鄂渚上江陵謁閩相

夫運帷幄籌草軍前檄母但曰白面書生之未學也
馬上撲鞭隨從軍樂後誦弔古戰場文使驚濤亂石
相顧駭愕者此重食武昌魚後會公案

長安二月春正濃長江二月風正急城頭楊柳雪絮飛
道旁粘雨沈潦濕邯鄲誰家俠少年上馬意氣揮金鞭
下馬掃筆大如椽興來一石未能醉劇飲數斗口流涎
玉山跌倒扶未起金鞭留當酒家裏隔樓彷彿畫眉人

相邀夜宿鴛鴦被睡魔不醒五更鐘笛聲吹斷相思淚
嚶嚶鳴雞將渡關欲去未去踟躕間道逢項莊把劍舞
樓上美人歌玉環剗然掣電蛟龍怒便指南樓問歸路
二千三百里更長爾僕衣糧我屣屨青衫著破不堪典
典到青衫誰共語世上豈無此髯漢散財結客千千萬
豈無燕昭萬黃金築作高臺禮瓌彥秦坑漢罵不肯收
自是一番遭薄賤唐人科舉更糊名天下英雄消阻盡
生兒不學去封侯毛錐弄秃成霜鬢世無荆斬樊於期

只今誰復是男兒我聞兵出戰危事愁殺天上蚩尤旗
人心永平易思亂中原塊土爭驅漢蔡人未下敵未誅
機來一髮不容間三邊未即妖侵清天乎何時能洗兵
送君不作斷腸客三客一騎君西征臨歧酌酒再三語
今日君王自神武此行投筆事班超不必區區問兒女
上流夜夜箭如雨下流砲火驚淮甸襄師重屯郢州北
北師未解長江面勸君莫賦橫槊詩樓頭正要籌邊策
軍前一著天下奇夜斬樓蘭無人知露布直到天子墀

六宮歡動龍顏怡惟清象武獻太廟未央前殿稱玉卮
搴旗斬將不足道運籌帷幄果為誰曰何功第一參次
之噫吁嘻帝命我公歸袞衣

長生

武皇何事駕虛空金闕求仙路未通王母不來方士去
茂陵可是廣寒宮

寄徐編校

近傳丹詔下彤墀夜鶴寒猿也自疑江上晚風終是急

山中白日最相宜
潮生潮滅鷗先見
花落花開蝶未知
懷玉山人如問我
爛柯山下看圍碁

重到都門做輓轡體

兩年不作京華夢
重到湖山事已非
柳外晚風寒夕節
花開天氣雨晴時
欄干獨凭鶯飛去
簾幕低垂燕未歸
欲托焦桐理心事
滿庭芳草又斜暉

蘇武

十九年間不辱君
論功何獨後諸臣
若教倒數凌烟像

也是當時第一人

金陵秋赴別江壽翁

憶向西風折翅歸每欣黃菊滿疎籬十書詣闕無知己
千里離家有路歧歲月易驚孤客夢文章難比少年時
荻花蘆葉休淒怨自有新開寶桂枝

子陵臺

曾與劉郎共起居如何不肯受除書最憐人笑先生錯
正好為官却釣魚

昭陽殿

禍水流來漢火亡
白頭宮女恨昭陽
至今人見飛來燕
猶為君王暗斷腸

竒氣樓

此齋全占崧高勝
更盡樓前第一竒
芳草碧連天水處
數峰青斷暮烟時
山川不逐陰晴換
宇宙閒看歲月移
琴已懶彈書懶讀
一簾花影詠春遲

高齋晚望

纔是青山便卜鄰
世情那得較紛紜
霧連遠岫分為雨
烟起人家去作雲
柳色晴光扶檻入
鶯聲人語隔牕聞
高齋獨卷重簾坐
花落棊牀日未曛

西湖

年年柳眼青歸處
門外遊人可自閒
天氣又晴晴又雨
樓臺依寺寺依山
酒邊歌拍穿花外
船上簫聲落水間
光景留連空自惜
鷓鴣啼罷暮城闌

山居

老來無一事，僮與鶴相隨。
繞屋疎疎竹，編牆短短籬。
起來花換影，知去睡多時。
莫厭山居寂，山人祇自宜。

客中夜雨

離情先怯向邊州，寒葉敲牕更報秋。
幾點攪殘千里夢，一聲滴作兩鄉愁。
苦緣楊柳沾離席，偶傍梧桐濺小樓。
惟有孤燈照明滅，夜深無語攬重裘。

江心寺

寺北金焦徹夜開，一山恰似小蓬萊。
塔分兩岸波中影，

潮長三門石上苔遺老為言前日事上皇曾渡此江來
中流滾滾英雄淚輸與高僧入定回

重題黃鶴樓

自從崔顥題詩後更有何人弔禰衡芳草不知鸚鵡恨
晴天惟見漢陽城樓頭月落酒方醒岸口風高雁正鳴
五百年前黃鶴去閒尋鷗鷺結詩盟

淝水

想見西風對壘時目中先已料安危淮淝百萬兵雖衆

未抵東山一局碁

除夕對梅

青春無復駐年華
幾度江梅暗憶家
惆悵新愁添白髮
鬢邊如雪映寒花

別永嘉使君趙致軒

一番出處計何如
流泊中川不為魚
落日淒涼秋老矣
西風浩蕩客歸歎
吟成白髮逢知己
費盡黃金買古書
明發灞橋橋上路
藉君帆力更吹噓

蘄州別友

客中逢客上夷陵
輾轉淒涼睡不成
無酒送君之遠道
有誰吹角向江城
白髮亂生人漸老
青燈相對兩無情
話朝共發蘄州岸
知到江山更幾程

上忠齋丞相四首

世事篙人一葉舟
長歌短棹發中流
今朝正得東風便
纔是西風便轉頭

爛柯山下採樵民
盡日觀碁局
局新黑白兩般多
著過

後來一著要高人

江南江北路迢迢
往事東風恨未消
昨夜杜鵑啼不了
始知春在洛陽橋

九陌紅塵撲帽紗
囊書幾度進官家
近來不甚知時事
只是栽桑不種花

即事

瀕洞風塵莽未明
天翻地覆劫將盈
翠華海上知何似
白首山中空自驚
笑向鶯花非世界
夢迷弓劍繞皇陵

誰知薇蕨同杯酒為醉興亡終古靈

和通判弟隨亨書感韻

風沙萬里夢堪驚地老天荒只此情世上但知王蠋義
人間惟有伯夷清堂前舊燕歸何處花外啼鶉月幾更
莫話淒涼當日事劍歌泪盡血沾纓

中秋待月用弟察推元彪韻

待月南樓月不明百年虛負此宵情浮陰亂向空中起
圓影偏從塞外清江國瀟瀟淒淒露氣山城處處動笳聲

何人獨抱琵琶坐淚滴水絃暗恨生

兩宋名賢小集卷三百七十七

欽定四庫全書

兩宋名賢小集卷三百七十八

宋 陳 思 編

元 陳世隆 補

王尚書遺稿

王應麟字伯厚，鄞人。九歲通六經。父性嚴急，每授題設，巍坐命坐堂下，刻燭以俟。少緩，輒訶譴之。由是為文益敏。捷淳祐元年舉進士。時年十九，從王栻受學。

初調西安主簿及監平江倉與提舉浙西常平茶鹽
徵賦弭亂俱有法又調揚州教授嘗以事舉子業者
一切委棄制度典故漫不省乃閉門發憤誓以博學
宏詞科自見假館閣書讀之寶祐四年中是科既而
添差浙西安撫使幹辦公事帝御集賢殿策士欲易
第七卷置其首應麟讀之乃頓首曰是卷古誼若龜
鑑忠肝如鐵石臣敢為得士賀遂以第七卷為首選
及唱名乃文天祥也累遷太學錄進武學博士屢疏

言事與丞相丁大全忤遂罷職大全敗通判台州召
為太常博士時湯文清公為少卿比屋而居朝夕講
道論闕洛濂閩江西之同異擢秘書郎俄兼沂靖惠
王府教授彗星見應詔極論執政侍從臺諫之辜積
私財行公田之害累遷秘書少監兼侍讀會賈似道
拜平章事因冬雷極言防姦邪總威福諸事似道斥
逐之以秘閣修撰主管崇禧觀久之起知徽州其父
嘗守是郡父老皆曰此清白太守子也推豪右省租

賦民大悅召為秘書監累遷起居郎兼權吏部侍郎
指陳成敗逆順之說時朝臣無以邊事言者及似道
潰師江上授中書舍人兼直學士院即引疏陳十事
進禮部侍郎日食應詔論答天戒五事陳備禦十策
且請更封濟王竑大國表墓賜諡如請行尋轉尚書
兼給事中覈奏留夢炎用私人徐缺為御史疏再上
不報出關俟命再奏仍不報遂東歸詔中使譚純德
以翰林學士召辭不赴家居二十年號深寧居士革

歷來杜門著述甚富卒年七十有四

鼈山

進士表鏞抗節死于此山家人投山下溺死者十有七人

天柱不可折柱折不可撐九鼎不可覆鼎覆人莫扛表
公烈丈夫獨立東南方欲以一已力代國相頡頏適遭
宋祚移恥為不義戕奮然抱志起誓欲掃欃槍拔劍突
前麾手回日月光敵勢愈猖獗山摧失忠良嗚呼絕倫
志不得騁才長妻孥悉從溺枯骨誰為襄忠烈動天地
遊魂為國殤山水倍堪悲抱恨徹穹蒼穹蒼幸一息庶

金史四八八
卷三百七十八
幾紀星霜西風白楊路哀猿號崇岡解劍掛墓柏泣下
沾衣裳惜哉時不利抽毫述悲傷

天童寺

十里青松接翠微梵王宮殿白雲飛鐘聲出岫客初到
月色滿庭僧未歸偶有閒情依淨土竟無塵慮瀆天機
明朝尚有登高興千仞岡頭一振衣

望春山

羣峯西南起還伏湖上丹丘立于獨神仙寓迹山水間

不在幽深在清淑松潭水暖龍欲起蕙帳人空鶴自宿
飛雲曉馭紫瓊車沆漑宵涵白銀屋蓬萊之名不可思
俗客須當避爾躅

東錢湖

湖草青青湖水平酒航西渡入空明月波夜靜銀浮鏡
霞嶼春深錦作屏丞相祠前惟古柏讀書臺上但啼鶯
年年謝豹花開日猶有遊人作伴行

唐開成年墓誌石

元至元二十七年城中握蘭橋旁民家築室穿土得
誌石一片其文乃唐開成四年太原王夫人之墓誌
謂其曾祖王元浩在玄宗時拜諫議大夫左庶子慕
巢由之志辭疾不就前宋尚書王應麟為詩以紀其
事

鴻濛肇開闢變嬗幾成毀寥寥斷竹歌瓦聖湖姚姒周
墳典以族詎認青烏子公琴記咎繇邢山稱東里葛清
失之矯璠璣過于侈焉知宮夾墓莫識龜言水銅槃字

十六銘自比于始延陵有孔篆烏寧半辭止漢甄猶簡
樸石章寢華靡無愧惟有道媚俗多虛美七松談士良
何以懲不軌載筆鮮南董襲浮謬藏否豈悟冢中人三
百年不死婦名弗出閭古未有碑誄諡見春秋初誌起
典午氏簪蒿隱士妻芳刻垂千祀楊高託不朽習之文
中理或犯葵丘禁息國事何恥蛾眉為黃土磨滅更誰
紀宰如此何人維邑之士女逸民孺仲喬冰雪濯紈綺
采儷古鄞州儉勤終莫齒試問幾年頗與銅人似雖

微黃絹辭亦質而不俚丘夷池又平蓬顆今廛市聚廬
寒劫灰餘光輝泥滓曰德巢由儔閨曰萊鴻比我行松
柏下勢榮朝菌爾隆碣牛礪角翁仲卧荆杞蘭艾均一
塵玉珉同一燬孤竹夢泡然柳下壟孰是片石幸有傳
詩以貽彤史

兩宋名賢小集卷三百七十八

欽定四庫全書

兩宋名賢小集卷三百七十九

宋 陳思 編

元 陳世隆 補

瑞州小集

陳失名 東甌人字號行履無考

山居

白雲護危屋遙隔世人
家野逕不多竹幽蘭
自作花敞

衣僧說法枯葉樹成槎門外禽相狎雙雙浴晚沙

湘靈鼓瑟

蒼梧雲杳杳湘浦月沈沈誰將竹間淚彈成絲上音如
怨復如訴可聽不可尋乃知二帝子尚懷千載心君臣
等天地死生空古今

貧居

秋風山木飛秋日獨行時身共衣冠老妻嫌富貴遲自
分澆菊水閒寫詠貧詩此意不可說夜牕明月知

江心寺

誰把袈裟築半峯倚雲樓閣打天鐘
東西塔上自分嶼風雨聲中忽見龍
隔岸愁吹孤戍角歸鴉寒立夕陽松
舊時行殿成荒土烟草萋萋暝色重

閩嶠軍中

翠華齊擁霍嫖姚却向青山說豹韜
兵馬夜行殘月下弓旌寒響朔風高
壺漿故老愁啼血野飯將軍猛茹毛
自笑書生隨玉帳也腰刀劍束征袍

秋興

禾黍離離雨滿村望中兵火幾家存
荒城半是征人骨
秋月偏驚旅客魂
豈意戰塵臨老見
不知心事向誰論
抱茆蓋得青山屋
多種桃花映酒樽

王宗起城南溪屋

水上小亭清更新
綠陰紈扇白綸巾
豈無修竹娛佳客
却有清風來故人
老樹秋聲涼入骨
澄江波影玉生鱗
讀書偏愛虛牕靜
不管門前庾亮塵

泉南滿歸過省下呈友人

二月泉南驛騎回，亂離懷抱為君開。
雙鳧暫假王喬力，百里空淹蔣琬才。
省幙薇陰遮案靜，溪船山色入樓來。
應知別後遙相憶，清夜吹簫月滿臺。

訪陳彥太不遇

每憶可人陳太丘，不辭山路遠追遊。
清霜拂鬢雞聲早，白鶴橫江月影浮。
豈為開樽無北海，虛聞懸榻待南州。
題詩興盡空歸去，回首梅花百尺樓。

九日次王善夫韻

道路多荆棘塵埃滿客衣西風九日至往事百年非王
祭思何切馮驩嘆未歸只因江漢遠却使雁鴻稀

小景

山迴雲垂野江空水接天西風陶令宅落日季鷹船愁
緒丹心外歸心白雁前如何倦遊客猶是未歸年

宋與寄友

落日猶未落青山還自青鳥飛雲外見泉過竹邊聽童

子求新汲先生守舊局相看不相見應註太玄經

病中聞歌有感

伏枕已三月清明節已過光陰流水去風雨落花多病
久難禁酒愁深懶聽歌門前舟楫動無奈客懷何

趙仲瑜小景

遠水望不極斷雲低復連青山秋樹屋野渡夕陽船幽
思滄洲上歸心白雁前異鄉非隱地聊欲寄林泉
老樹依巖壑危橋隔遠村桃花春滿岸雲氣曉當門白

鳥來書屋青山落酒樽
漁舟忽相過疑是武陵源

官舍有感

臘近衣方授山深寒愈嚴
病將書卷廢愁伏酒杯添
故里風塵隔微官歲月淹
思歸歸未得低首愧陶潛

王生小景

何處佳山水依稀類輞川
春風摩詰畫夜月剡溪船
雲樹鄉心外鶯花客淚邊
不嫌茆屋小應喜是歸年

秋夜風雨次韻

獨卧苦不寐燈殘知夜深青羶猶是客白髮最關心遠
屋烏三匝隔江龍一吟誰家催寄遠孤淚滴清砧

中秋客邸感懷

今夜天邊月誰期海上看家山雖間隔兒女暫團藥露
重銀蟾濕風清玉宇寒年年長是客強把一樽歡

偶成

滑滑春泥塞路途漫漫新水漲江湖出門世路皆行險
只好山林聽鷓鴣

南山作雨北山雲野哭村歌處處聞
淮岱十年多盜賊誰知一半是官軍

城南春深草亂飛門前流水沒漁磯
百年此地踏青客今歲從軍猶未歸

回回僧

秋風響耳環古恠聚人看赤脚行霜地
腥身禮月壇僂齋猶買肉掛帛不遮寒
亦有西來意相逢欲語難

羅浮山

在江心寺後世傳
秦時浮海而至

乾坤未失鹿滄海欲飛灰人已逃時去山猶擇地來寒
流清有影恠木老非梅西有龍翔寺禪門徹夜開

夜歸

青松行未盡林外一鐘聞小雨不傷月西風忽破雲棹
歸秋水遠隣語夜燈分稚子能無寐空齋讀古文

欽定四庫全書

兩宋名賢小集
卷三百七十九

兩宋名賢小集卷三百七十九

欽定四庫全書

兩宋名賢小集卷三百八十

宋 陳思 編

元 陳世隆 補

待清軒遺稿

潘音字聲甫天台人宋季躬耕不仕築室南洲山中
詔徵天下遺逸廉訪使檄贊之行固辭有待清軒遺
稿

采芝歌 四首

嗟嗟紫芝在彼高岡于以采之可以充腸唐虞往矣吾
身可藏峻宇雕牆未或不亡富貴之畏人兮不若貧賤
之徜徉

嗟嗟紫芝在彼幽谷願言采之可以充腹唐虞往矣吾
生未卜高牙大纛其額也感富貴之畏人兮不若貧賤
之戩穀

嗟嗟紫芝在彼層巒于以采之可以常餐唐虞往矣吾

將誰干佩玉鳴鸞其生易殘富貴之畏人兮不若貧賤
之身安

暄暄紫芝生彼白石願言采之可以終夕唐虞往矣吾
將安索隋珠趙璧寧保無失富貴之畏人兮不若貧賤
之自適

有所思

中心有所思感損雙蛾眉美人竟長往使我嘆離居寂
寞就孤枕強眠誰得知夜深清露重飛夢欲何之覺來

日遲遲分照上羅帷
粧臺理雲鬢種種盡成絲

遠遊

聖人久不作大道將已矣
吾生既無之惟有幸夕死殷
勤謝良友遠涉西江水
方從草廬公共究鵝湖旨紛紛
朱陸議竊幸窺端倪奈何執德偏
一聘翻然起春秋嚴
內外乾坤定冠履西蜀已空亭
箕山仍洗耳迢迢返岩阿
惟當隨鹿豕

論學

吾生媿不學學須明吾志軒冕豈不榮此身寧自棄魯
叟重成仁孟軻貴取義尚然周可粟況乃秦未帝東海
薄連城首陽藐千駟萬古為綱常殺身何足避

讀石子重先生輯畧

吳越遠中原斯文久寥落季子已邈如言偃亦渺若干
載萃貞元石城倡絕學游揚出程門論議紛灼爍先生
咀其華用傳此輯畧言深旨斯遠施博守則約餘生媿
顛蒙遺言仰光覺大道闢荆秦天性啟素籥誠身須固

執擇善無躋駁孔門授受宗誰云盡糟粕

讀黃宣獻公註疏

偉哉黃宣獻讀書盈萬卷正色動岩廊抗疏回霄漢雅
志薄紛華幽情耽散玩白首窮簡編頻年下帷幔折衷
孔鄭言兼採程朱傳諸經咸有疏殊條盡同貫我幸讀
典謨更得觀象豕三百與三千恨正窺其半聖賢傳心
訣帝王經世案昭回儼日星鄭紫那能亂

景行篇

吾道久不南於越劫荒裔千載竟寥寥誰能談六藝卓
哉石城翁三塾開里第二程遊其間談道析巨細曠
始窺斑飲食纔知味民也揚其波磔也探其秘師師羨
家承濟濟多澤麗正直俞長公高明黃叔子註書析牛
毛辭榮輕敝屣吾宗晴牕翁孤標揚晚歲默默躬行身
侃侃斯道衛朝陽聽鳳鳴九臯聞鶴唳嗟予生不辰斯
文已墜地子居空山阿遠謝人間世高山仰諸賢寤寐
為擁篲庶幾啟予思夕死一微惠

山中寄友人

我來卧白雲潭影清華髮經歲無稻梁侵晨采薇蕨峯
頭天籟鳴隴上樵歌發還擬醉濁醪與君弄山月

反北山嘲

四首

達人知進退曲士豈同謀盡使藏身去誰當為國憂烟
霞成痼癖聲價藉巢由虎嘯雄心在胡為鶴唳愁
雲壑藏真客金門寄跡仙神遊招隱賦興致考槃篇
鹿耽豐草龍蛇起大川由來枯槁輩長往不知旋

一自著荷衣襟期與世違
荒唐高士傳偃蹇北山薇
欵枕聞寒瀑衡門嘆落暉
臨文每相誚猶爾未忘機
橫議還應熄孤標未可親
負薪生德色帶索竟驕人
高蹈箕山上潛蹤潁水濱
韋編有明訓苦節若為論

友人夜宿

雲山多樂事叢桂共君攀
別去十年久歸來兩鬢斑
倚牕邀素月把酒慰離顏
醉後松堂卧濤聲落枕間

喜雨

祝融嚴號令萬物瘁紅爐甘雨時還降蒼生氣欲蘇隴
頭饒黍稷澗畔長彫胡獨有夷齊老恒饑色自腴

春暮

門徑鎖烟霞春深山色嘉焚香清晝永把酒綠陰斜燕
雀銜梅豆蜘蛛網柳花塵埃渾不到疑是武陵家

久雨

蕭蕭風雨後四望盡波瀾川湧蛟龍鬪雲低鳥鵲寒楚
王愁枕簟湘女泣琅玕烟火孤村絕流離未有餐

南洲丁氏草堂

仙客栖真處，衡門枕曲流。
地偏三島接，天迴萬山浮。
匣劍星霜久，函書洞壑幽。
忘機對鷗鳥，華髮老滄洲。

石佛寺

步入迦林逕，森嚴梵宇開。
洪濛承覺運，石壁現如來。
法相元難壞，雲衣不用裁。
九年長面此，早已出塵埃。

答揭公

名孫斯

羨爾聲聞著，慙予志慮消。
空將鳥跡字，遠寄鹿門樵。
白

雪應難和青山未可招從茲採芝去不惜路迢迢

遊石梁

空濛岩岫轉絕徑石梁懸半壁留雲壑長虹掛玉川采
真移杖履覽勝拂嵐烟此際塵凡隔桃花滿洞天

悼楊侍郎

屈指漢遺老如君復幾何鳳池冠劍近鈴閣典章多國
已成禾黍人還隱薜蘿那堪川上水東逝之迴波

過黃宣獻公故居

翩翩黃叔度早已擅鴻名
元老揚休色中朝曳履聲
風烟接閭里瓜葛自親情
萬卷書何在空堂鳥鵲驚

避暑

避暑青山裏炎涼迴不同
層崖消雪水高壑振松風
尚可倚韓衆何妨謝祝融
迴看車馬客烟火市塵中

返照

晚眺豁冲襟芒鞋渡石林
山明殘照在水淨落霞深
白髮求三豸頽年望五禽
欲歌梁父句寂寞不成音

積雪

萬山堆積雪一望浩漫漫道陽春曲應愁朔漠寒
安門外色蘇武海邊餐千古俱搖落令人每自嘆

尋梅

雪凍層巔石膚裂萬壑寒飈吹不歇懸思隴上一枝梅
歲杪空山逞竒絕呼童策蹇漫尋春玉蕊初開丰采新
天涯有客長相憶折得寒香寄遠人

山居阻雨

霏霏風雨暗郊原有客含凄獨掩門
山鬼嘯雲移峭壁
毒龍將海漫孤村愁來自洒青楓淚
戰罷誰招絕漠魂
繭足空齋無一語不因岑寂怨黃昏

東溪水漲

積雨經時苦自長東溪迴首意淒涼
連山巨浪飛春雪
數點驚鷗下夕陽神女含情愁洛浦
美人揮淚洒瀟湘
欲尋舟楫無由渡咫尺天涯共渺茫

中秋無月

脩然杖履步層臺為望嬋娟海嶠來秋半正當華月滿
雲深不見廣寒開久拚良夜愁中度却恨流光暗裏催
濁酒那堪酬節序倚風長嘯轉生哀

登樓秋望

木落霜清雁影流偶來長嘯獨登樓笳鳴薄暮寒鴉集
劍倚遙空紫電流萬里邊塵連大漠一樽漢月醉高秋
深閨少婦思征戍何處聞砧不動愁

雁岩

一派清漪景色偏
洪濛鑿破碧雲巔
排空瀑布長飛雪
競秀竒峯直插天
玉女鏡中鬟影亂
真人掌上露華鮮
霜高雁陣衝寒度
未得音書海曲傳

月夜有懷

碧天如洗月團圓
有客興懷意渺漫
古木烟消烏鵲繞
空山露滴桂枝寒
緘書絕塞人何在
搔首秋霜鬢已殘
坐聽寒蛩渾不寐
夜深無語獨凭欄

曉起

銅壺曉滴漏迢迢坐倚空山四望遙霞彩薰蒸星象斂
嵐烟擁護石梁高襟披左袒心猶壯目極中原恨未消
嬾向鏡中看白髮已拚蹤跡混漁樵

真覺寺訪蔡上人

為尋支遁扣禪關趺坐觀空出宇寰淨土無塵勞白拂
天花如雨落青山龍皈寶座香雲滿鴿繞經臺佛日閒
誰謂陶潛偏嗜酒從今蓮社未應還

龐德公

高士遺蹤尚可尋
襄陽城外闕幽林
久知軒冕浮榮薄
已卜耕鋤樂趣深
麟閣不圖丘壑相
鹿門應逐白雲深
千秋事與人俱往
滿目松楸帶夕陰

題淵明對菊圖

當時陶令拂衣回
坐見南山逸興催
襟度自宜黃菊侶
酒樽時有白衣來
賦成倦鳥斜陽度
書法麟經甲子開
千古高風那可挹
翩翩大雅出羣才

讀岳武穆傳

萬里浮雲入望陰
千山落日正沈沈
當朝自餒中興志
出塞徒勞上將心
臣子終天仇未復
奸邪設險計殊深
惟餘一篋精忠傳
揮淚頻看不自禁

悼文丞相

回首中原已陸沈
捐軀朔漠氣蕭森
恐吹餘燼成炎漢
未許黃冠返故林
社稷忽生千古色
綱常無忝百年心
總拚清骨縈荒草
不復風沙掩素襟

觀稼

欲粟何處畊欲帛何處桑縱使甘凍餒偷生良自傷

遊天姥懷李白


崔嵬天姥振滄洲李白當年夢裏遊
一自烟霞歸綵筆山靈長倚碧空愁

題許由棄瓢圖

自是清流謝帝堯潁川洗耳絕塵囂
放勳事業今安在仍羨當年一棄瓢

聞鵑

子規聲切月輪斜起望諸陵憶漢家婦女尋芳渾不解
鬢雲爭插杜鵑花



兩宋名賢小集卷三百八十